



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Lunæ vigesima-tertiâ
mensis Martii, Anno Domini M. DCC. L.*

M. RAYMUNDO DE LA RIVIERE,
Doctore Medico, Præsede.

An in morbis Melancholicis purgatio per inferiora?

I.



BLANDISSIMUM vitæ condimentum sanitas ;
absque eâ nulla naturæ, nulla fortunæ bona ; lon-
gius ab eâ recedit qui mente laborat, quàm qui
ægrota corpore. Cunctis hominibus eadem Animæ,
ut ita dicam, fabrica, ingenium non cunctis idem.

Hujus varietas ab Organorum conformatione & humorum dis-

A

2

positione pendet, sicut morborum diversitas. Tenuis humor ut plurimum acutos parit, crassus chronicos. Inter chronicos reponitur Melancholia, quæ mentis alienatio est sæpissimè cum metu & tristitiâ conjuncta. Hunc affectum generat obscura cerebri dispositio, cum pravâ sanguinis indole & partium inferiorum vitio. Suspirium frequens, somnia terrifica, silentium, demissio animi, desidia, hebetudo, oblivio, lucis fuga, contemptus rerum omnium hanc comitantur ægritudinem. Hæc omnia arguunt crassi ac terreni humoris dominium.

I I.

ANIMÆ proprium est cogitare. Inter eam & corpus insigne societatis vinculum. Ex diversis partium corporis motibus variæ exurgunt in Animâ cogitationes, & vice versâ distinctæ cogitationes distinctos motus edunt in corpore. Mutuus ille concursus ex summi Opificis decreto proficiscitur. Animi pathematis occasionem præbet humorum natura. Gaudium à laudabili sanguine & mediocriter subtili, dum blando ejus motu cerebrum placidè commovetur, undè grata animæ cogitatio. Furor, Ira, Audacia rapidissimum bilis motum sequuntur. Mœstus & tristis est qui non posse se putat imminens malum arcere, aut optatum bonum consequi, propter imbecillitatem virium, motus inertiam, membrorum segnitiam. Undè hæc, nisi à sanguine fœculento, melancholico, vix mobili, spiritus ejusdem indolis suppeditante?

I I I.

CORPUS humanum ex infinitis penè numero canaliculis unum efficitur. Per hos variî liquores trajiciuntur, quorum alii utiles, alii excrementitii. Illos fursùm, si tenues, deorsùm, si crassi, Natura propellit. Ne credas tamen partes inferiores spiritu orbari; hic per nervos delatus actionum cujuslibet partis primus auctor jure ac meritò censetur. A debito istius influxu liquores corpori inservientes justam subeunt partium miscelam, eâque mole & quantitate procedunt quâ recto consulatur usui; omnia tunc ritè peraguntur: secùs, corporis œconomiam interturbant, pervertunt, dirimunt; morbus adest. Quo quidem in casu morbi natura, partium conditio, earum situs indicant re-

medii formam , & quâ viâ sit eliminandus humor. Debet enim Medicus naturæ Minister & imitator illius motum sequi. Sic tenuis humor si peccat , sive per habitum corporis quò fertur , sive per superiora est abigendus , crassus per inferiora.

I V.

QUO vividior alicujus corporis motus , eò magis à centro recedit , motûs sui impedimenta faciliùs superat , & lineam rectam describit undè sanguinis à sinistro Cordis sinu prorumpentis tenuior portio ad caput avolat , crassior pellitur ad inferiora. Hujus terreni succi sedes est ac receptaculum Vena Portæ , ramis suis per lienem , mesenterium & intestina sparsis lentissimo gradu sanguinem resorbens. His adeò obstructis vasibus moles sanguinea à succo melancholico non repurgatur , hinc circuitu sanguinis fæx illa rapitur , ad diversas deindè corporis partes , in quibus innumera tum symptomata ludit , jugiter appellenda. Tot malorum curationem , naturâ monstrante viam , prudenter aggredietur qui confugiet ad catharticum , sectâ priùs saphænâ , & præmissis blandis solventibus saponaceis : hâc semitâ quâ spontè fertur crassus humor , citiùs tutiùsque foràs educitur.

V.

OBSCURE loquitur qui catharticum sympathiâ aut antipathiâ agere contendit ; clariùs , qui affirmat idem irritando purgare , & novam excitando in humoribus fermentationem , seu motum intestinum , quo à vinculis quibus impediuntur eorum particulæ , extricentur. Undè ab Emeticis Cathartica multum discrepant , nempè quòd illorum evolutio fiat tantum in ventriculo ; horum dissolutio inchoetur in stomacho , perficiatur in intestinis. Emetica constant particulis tenuibus & efferis , motuque concitatissimo præditis , cerebrum lædunt vehementi concussione , partibus superioribus humorem melancholicum impingunt potius quàm ex iis eliminant ob angustiores meatus vacuandis succis crassioribus ineptos : deindè verò nusquam suscitatur vomitus absque periculo. Quæ per inferiora purgant , minorem vim inferunt corpori , humoris vacuationem naturæ consentaneam moliuntur per vias corporis patentiores , aptioresque expulsionem.

5

crassioris excrementi : à principibus partibus humorem noxium
removent , sedem morbi oppugnant in ipsomet sitam abdo-
mine.

Ergò in morbis Melancholicis purgatio per inferiora.

DOMINI DOCTORES DISPUTATURI.

M. Claudius Person.

*M. Joannes-Stephanus Guet-
tard , Regia Scientiarum
Academia Socius , Censor
Regius & Serenissimi Au-
relianensium Ducis Bota-
nicus.*

*M. Joannes Astruc , salubris
Consilii Regis Socius , Regis
Poloniarum Augusti Se-
cundi Electoris Saxonia ,
dum viveret , Medicus
Primarius , & Professor
Regius.*

*M. Ludovicus - Renatus
Desbois.*

*M. Natalis-Maria de Ge-
vigland.*

*M. Bernardus de Jussieu ,
Regia Scientiarum Acade-
mia , Regiaque Societatis
Londinensis Socius , & in
Horto Regio Botanices
Prodemonstrator.*

*M. Carolus - Ludovicus
Liger.*

*M. Franciscus-David Hé-
rissant , Regia Scientiarum
Academia Socius & Chi-
rurgia Professor designa-
tus.*

*M. Joannes-Baptista Boyer ,
Regis Consiliarius Medicus
in supremo Senatu ac in
Præstulâ Parisiensi , Se-
renissima Cenomanensium
Ducissæ Medicus Ordina-
rius , Censor Regius , Regia
Societatis Londinensis So-
cius , & utriusque Phar-
macia Professor designatus.*

Proponebat Parisiis , JOANNES MAC - MAHON ,
Laonensis in Hiberniâ , Doctor Medicus Remensis , ultimo sæ-
viente Bello , Medicus Exercituum Regis ad Rhenum , Neo-Bri-
faci in Nosocomio Regio Medicus Ordinarius , necnon Saluber-
rimæ Facultatis Medicinæ Parisiensis Baccalaureus , A. R. S. H.
1750 , à sextâ ad meridiem.